

Lostâmediatiäđáttâs 10.10.2012

Almostittemrijjá tállán

Sáminuorah Suomâst -seminaar 10.10.2012 Ovdâskodde, Uccâparlament

Sámitige nuorâiräädî já Suomâ sáminuorah ry ornijn Helsigist seminaar sáminuorâi tááláá tilleest já puátteevuodâst Suomâst.

Seminaarist sáminuorah puhtii uáinusân sijnán äigikyevdilijđ já tehálijđ aášijđ. Árbivuáválâs iäláttásái táálâs tile, eenikielâ merhâšume, säámi máttááttâsvuávám tehálâšvuotâ já olgosámmilâšvuotâ lijjii tehálumoseh äáših, maid nuorah puhtii jieijâs saavâin uáinusân.

Sáminuorâi uáinui lasseen seminaarin lijjii puávdejum puohâi ovdâskoddeest čokkájeijee piäláduvâi ovdâsteijeeh paaneelsavâstálmân, mast piäláduvah ožžu vástidiđ jieijâs piäláduv linjá miáldásávt sámmilijđ já aainâs sáminuorâid kyeskee koččâmâššáid.

Seminaar lehástij Suomâ sámitige saavâjodetteijee Klemetti Näkkäljárvi. Näkkäljárvi luptij jieijâs saavâst uáinusân šiev ovdâmerkkân vaikuttemmáđulâšvuodâin nuorâi aktiivlášvuodâ sámpolitiikâst.

Sámitige nuorâiräädî saavâjodetteijee Laura-Maija Niittyvuopio muštálij jieijâs sánivuárust nuorâi máđulâšvuodâin já hástusijn vaikuttid jieijâs aášijđ. "Sáminuorâid lii ovdánmin máđulâšvuotâ vaikuttid sáminuorâi sajattâhân. Váldikodálávt taan máđulâšvuodâ ovdánem kalga turvid ekonoomlávt pisovâš čuávdušijguin já resurssijguin."

Paaneelsavâstálmist lijjii mielđi Suomâ Kuávdáá Simo Rundgren, Suomâ Sosiaaldemokraatlâs Piäláduv Johanna Ojala-Niemelâ, Suomâ Ruátálâs aalmugpiäláduv Astrid Thors, Aalmuglâs Kokoomus Heikki Autto já Ruánáá Lito Outi Alanko-Kahiluoto. Paneelist eromâšávt äigikyevdilis äššin pajanij ILO 169-sopâmuš, já toos oovdán puáttám kyehti sierálágán uáinu sáminuorâi jieijâs koččâmâššáid. RAP já Ruánáá lito ovdâsteijeeh ettii piäláduvâi linjâžân tuárjuđ nanosávt ILO 169-sopâmuš ratifisistem. Kuávdáá, Kokoomus já SDP ovdâsteijeeh ettii piäláduvâi uáinun, et ILO-169-sopâmuš ij eidu tääl lah máđulâš ratifisistid, ko piäláduvah väätih ovtâskâsoojij täärhib keččâm, el. sámmilâšmiäruštálmist já eennâmvuoigâdvuodâkoččâmâššáin. RKP ovdâsteijee Thors lâi hiámâškâm eres pääihi alne lamaš haldáttâspiäláduvâi (Kok já SDP) negatiivlâs uáinust, ko taan haldáttâspaje haldáttâsohjelmist lii uáivilin ratifisistid áášánkullee sopâmuš.

Seminaarist Suomâ sáminuorâi saavâjodetteijee Tuomas Aslak Juuso tiäduttij OA algâaalmugij vuoigâdvuodâi julgâštâs merhâšume ubâ sámi kulttuur- já kielâ oovdedmist já ohtân kuávdášlâs äššin ILO 169-sopâmuš ratifisistem prosessist. "OA algâaalmugij vuoigâdvuodâi julgâštâs já ILO 169-sopâmuš sulástiteh siskáldâsâs peeleeest viehâ čuuvtij nubijdis. Muu mielâst Suomâ lii nanosávt čonnâsâm OA algâaalmugij vuoigâdvuodâi julgâštâsân sehe ton jieškote-uv artiklaid já taam kolgâččij váldid vuotân ILO 169-sopâmuš ratifisistem prosessist."

Seminaarist nuorâ sámmiliih puhtii oovdán sámi kulttuurân lohtâseijee hástusijđ, mut kuittâg jyehi nuorâ saavâst lâi tuáivu puátteevuodâst!

Lasetiäđuh:

Sámitige Nuorâiräädî, saavâjodetteijee Laura-Maija Niittyvuopio puh. 040 846 3053

šleđgâpostâ: laura.niittyvuopio@gmail.com

Suomâ sáminuorah Ry, saavâjodetteijee Tuomas Aslak Juuso puh. 044 253 6426

šleđgâpostâ: tajuso@hotmail.com